

IUDE

Iude yana kiluma.

Iemesa taina 'ana wagava Iude leta de'e i kilumi. We'e Iemesanina, tovetumaganavo i miamianiga Ielusalema, taunina 'adi to'edakumeta bwaikina. To'aseta fue di yadi nuanua, Iudenina kumanina Iesu taina. (Malika 6:3)

Tovetumagananidi 'waidie i kilumaga, de'e leta nageneye Iude kebu i da lu'ivoneyeniga. I kilumaga igodi nuanuana i da veifufu 'ada 'ita'ita'i Yaubada 'wainega faifaina nika vala i nogai tove-vekavekali yadi ve 'waidiega tovetumaganavo i vevekaliedi, bega leta de'e 'wainega i matakia 'waidie. Wata i velu'ase'asedi ve mogitana Iesu faifaina 'adi 'ibababala. De'e letanina 'ana 'idi side bani'odi.

Vona-vekaiwa. 1:1-2

Tove-vekavekali yadi sauluva, yadi ve, wata yadi wafaotoga faifaidi.

1:3-16

I na tokemaigedi yadi vetumagana 'waidie. 1:17-23

Yaubada wata Iesu Keliso 'adi subia. 1:24-25

¹Yau Iude, Iesu Keliso yana tofola wata Iemesa taina, a vekaiwa 'omi tomotoganimi Iesu Keliso tutuya fue di i 'ibababalemiga 'waimie. Yaubada Tamada i vena'ivinemi wata i nunuakalikaliemi. ²A vevelu'ui faifaimi nuanuaku Yaubada i na 'lisanuakalikaliemi, nuanua bikana mia 'atumaina taiadi i na vevelemi, wata tutuya fue di i na nunuakalikaliemi.

Tove-vekavekali faifaidi.

³Ekwavo, nuanuaku a da kilukiluma 'waimie fueda 'ada 'ita'ita'i Yaubada 'wainega faifaina, siwe 'asiau a vebaeku mogitana a na kiluma 'waimie tamu nani faifaina. Nuanuaku Yaubada yana Vona Tonovidi 'wa na 'ibababaledi tove-vekavekali 'waidiega, Vonanidi basenadi i 'anivelena-tamogeni tutuya matatabuna faifaidi yana tomotoga 'waideye. ⁴Nuanuaku 'wa na 'ibababalediga fai Yaubada

^a 1:4 2 Ion 1:9-10; Lom 6:15

'ana tovedumwe'ai'ai 'ifwaidi i yogosebaseba i vevekali 'waimie i vo, 'Wa vetumaganaga Iesu 'waineye begaidi Yaubada kebu vematavuloga i na velemiga i na nuakalikaliemimo, 'ami fata 'wa na sakosakona." Tovekalinidi faifaidi basenadiotoga i kilumi Yaubada yana Buki 'waineye, 'akonadi Yaubada i veimea 'adi vematavuloga i na veluagai fai 'Auvea Iesu Keliso, 'aiseotogina 'ada Toveimea i vedumwe'ai'aieni.

⁵^bVona mogitana tovedumwe'ai'ainidi vematavuloga i na veluagai Yaubada 'wainega bani'odi basenadi tosakona i veluagai. Nani de'e 'akonadi 'wa 'asetai siwe nuanuaku a na tolinuata'iemi nika 'wa na nuani. Basenadiotoga me Isileli matatabudi 'Auvea i 'ita'ita'iedi Itifita 'wainega i vagavaidi siwe mulieta 'ifwaidi i luvewafadi fai kebu nuanuadi i na vematayakayaka 'waineye. ⁶^cWata 'wa na nuani basenadiotoga anelose ma yadi veimea siwe 'ifwaidi i baila nuanuadi sakona bega yadi 'eba mia i 'iaweni. Tobailanidi Yaubada i yogona-vagasedi i yatodi Vatu'ai Manamanawena 'waineye, dudubala nageneye, mulieta Vonayavuga 'ana 'Aiata 'waineye, i na veimea 'adi vematavuloga faifaina.

⁷^dWata bani'odi 'atamana 'ailuga Sodoma wata Gomola 'ifwaidi 'atamana lilivadie taiadi. Basenadiotoga 'atamananidi 'adi tomotoga i veve'avula-'avo'avovo anelosenidi sakoidi bani'odi, wata iaveta'ava i sakosakona. 'Akonadi 'adi vematavuloga i veveluagai 'ai-'ala'alase kebu yana 'weuga 'waineye, tomotoga matatabuda yada 'eba 'isa bei tosakona vematavuloga i na veluagai.

⁸Tomotoganidi i sakonaga wata bani'odi tove-vekavekali yami 'aila'a nageneye. Yadi 'enoneganega i vevekaliedi bega bunu 'ana nuanua 'waidiega i sakosakona. Yaubada yana veimea kebu nuanuadi i na vematayakeyakedi wata anelose magemagetadi abame, 'waidie i manimanini-'avo'avovo. ⁹^eI lubwainedi kebu i na manini-'avo'avovo. Basenadiotoga Mosese i wafa, Yaubada anelose 'adi to'edakumeta 'ana wagava Maikeli i vetunei 'ana ve'ufa faifaina, Seitani taiadi i ve'ikwayekwayegeni. Siwe Maikeli ma yana ve'ililibu Seitani i vonenimo kebu i da yagaia, i vo, 'Auvea taunina i na talabodemu." Maikeli toketokena ma yana veimea, siwe Seitani i ve'ililibuyeni, begaidi tovenidi, taunidi tomotoga-'avo'avovo i lubwainedi anelose magemagetadi i da ve'ililibuyedi. ¹⁰Siwe naninidi i bavuyediga, 'waidie i manimanini-'avo'avovo. Taunidi yadi nuanua ava'ai i nuaniga 'aisedi i 'l'idewadi 'aisaya walawala'ai bani'odi, nuanuananidi sakoidi 'waidiega taunidi i 'iveilagidi 'awaie i na wafaotoga.

¹¹^fNuakalikali, Keni kumanina taunina taina i luvewafai, yana sauluva i 'ewai. Taunidi i tauyedi sakona 'waineye fai nuanuadi mani, bani'odi

^b 1:5 1 Kol 10:5-10; Num 14:32-35 ^c 1:6 Nag 6:1-2 ^d 1:7 Nag 19:1-10,15-16,24-25; 2 Fit 2:6-9 ^e 1:9 Dan 10:13; VeL 34:6; Ve 12:7-8 ^f 1:11 Nag 4:8; 1 Ion 3:12; 2 Fit 2:15-16; Ve 2:14; Num 31:15-16, 16:1-3,16,19-21,25-33

basenadiotoga Belami nuanuana mani bega i sakona. Tovenidi Yaubada yana veimea i vevedumwe'ai'aiedi bega vematavuloga i na veluagai bani'odi basenadiotoga Kola i veluagai fai Yaubada yana veimea i uvi'agali.

¹² Tutuyanina 'wa 'a'aniluvetubama Iesu 'ana nuave'avina faifaina tovekalinidi 'awasasamie bani'odi yoke, 'awadi bwalabwalaidi kebu yadi bunumayaga i sososoana-'avo'avovo, taunidi 'aisedi faifaidi i nuanua. Inala kabukabu 'ana tutuye waowa i na bweuya ta na sosoaneni siwe kaukau i na beweni 'aivaita kebu ta na veluagai. Tomotoganidi wata bani'odi, kebu tamu sai'afo 'waidiega 'aivaita ta na veluagai. Taunidi bani'odi welavi, vuaga 'ana tutuya 'waineye kebu i da vuavuga 'wa da vo i da bwavu, we'e tomotoga i na talayavulediga nika i na bwavuotoga. ¹³ Yadi sauluva sakoidi 'eba bunumayaga tomotoga matadie, bani'odi yagina bwaikidi buobuodi. Wata taunidi bani'odi 'ibadibadi yadi sauluva 'wainega 'wa na vo 'ako, Magemagetadi", siwe tutuya 'ale'usana wata i na 'a'ava, we'e yadi 'eba mia Yaubada i 'idewa-vagaseni dudubala 'weya'weyauotogina 'waineye, bei i na mia-vagata.

¹⁴⁻¹⁵ Tove-vekavekalinidi faifaidi basenadiotoga Inoki i vona-vagata. Inokinina 'adi ve-7 tubulelelegidi Adama 'wainega, yadi sauluva nagami i 'asetai i vo,

A na vonemi. Toveimea i na mai yana anelose magemagetadi taiadi, 'adi 'aila'a welavi 'adi 'ilukulukuta bani'odi, tomotoga matatabudi i na vonayavuga mataneye. 'Ana tovedumwe'ai'ai sakoidi i na veimeyedi vematavuloga i na veluagai, yadi sauluva sakoidi wata yadi awavesako Yaubada 'waineye 'adi tutula."

¹⁶ Tovenidi tutuya fueidi i vevebonavoluvolu wata 'ai'edi vita i na souyedi 'waidie, faifaidi mali tomotoga i vevevita-maimaigidi. Taunidi i awa'ai'aidi, taunidi yadi nuanua sakoidi i 'i'idewadi wata tomotoga 'waidie i susubia-sebaseba bega naninidi nuanuadi, i na veledi.

Matakia wata velu'ase'ase.

¹⁷⁻¹⁸ ^h Ekwavo, 'wa na nuani basenadi 'ada Toveimea Iesu Keliso yana tomata'aulelevo nagami i vonemi i vo, Tutuya 'eba ve'a'ava sai'afoga i na velilivana tomotoga 'ifwaidi i na tovoi i na sisidibidibiemi wata taunidi yadi nuanua sakoidi i na 'i'idewadi." ¹⁹ Vona mogitana tove-vekavekalinidi yadi sauluva bani'odi, yadi ve faifaidi tomotoga i veve'ikwayekwayega bega ve'idi'idi i sousouyedi. 'Anu'anunu 'Atumaina yana nuanua kebu nuanuadi i na vematayakeyakeni, we'e taunidi yadi nuanua bunu 'ana nuanua sakoidi faifaidi, 'aisedi i 'i'idewadi.

²⁰⁻²¹ ⁱ We'e ekwavo 'omi kebu bani'odi 'wa na munega. 'Akonadi 'wa vetumagana Yaubada yana Vona magemagetana 'waineye, siwe nuanuaku

§ 1:12 1 Kol 11:20-22; 2 Fit 2:13 ^h 1:17-18 1 Tim 4:1; 2 Tim 3:1-2 ⁱ 1:20-21 Kol 2:6-7; 1 Kol 3:9-11

taunimi 'wa na kiavetoketokemi bega yami vetumagananina fa'alina i na 'eno'eno. 'Anu'anunu 'Atumaina yana toketokena 'wainega 'wa na vevelu'ui we'e tutuyanina 'ada Toveimea Iesu Keliso 'wa na lulukamaseniga, taunimi 'wa na 'i'isave'avinimi bega Yaubada yana nuakalikali 'waineye 'wa na miamiani. I na nagoga Iesu yana vila-vaitugana 'waineye ma yana nuakalikali mia 'atumaina wata miamia-vagaina i na veleli.

²²J'Egavo ve 'ailuga faifaidi i vevenuanaluga 'wa na 'isanuakalikaliedi 'wa na 'ivaisedi. ²³'Ifwaidi i sakona 'wa na kiavenuaviladi 'wa da vo tamu tomogo 'ai-'ala'alase i da be'u 'wa da 'ita'ita'ieni. We'e 'ifwaidi tomotoga i sakona-vebogiga 'wa na 'isanuakalikaliedi 'wa na 'ivaisedi i na nuaviladi Iesu 'waineye, siwe ma yami kololo 'wa na 'isa'isa i na nunago yadi sakona nuami i na 'ewadi nika 'omi wata 'wa na be'u. Mogitana 'wa na 'isanuakalikaliedi siwe yadi sakona 'wa na vedumwe'ai'aiedi.

Subia wata velu'ui.

²⁴⁻²⁵^kKebu tamu wata aitoi Yaubada bani'odi, 'aiseotogina, i 'ita'ita'ieda sakona 'waidiega Iesu Keliso 'ada Toveimea 'wainega. I lubwaineda matatabuda ta na subisubiai, taunina magemagetana, ma yana toketokena nani matatabuna i veveimeyedi, basenadi, 'asiau wata 'awaie yana toketokenanidi kebu i na 'a'ava, i na 'eno-vagata. Begaidi Yaubada 'ana fata i na 'isave'avinimi bega kebu 'wa na be'ube'u sakona 'waidie, i na nagoga mulieta ma yami sosoana bwaikina i na miemi mataneye, yana 'ai'aiwabu magemagetana 'waineye. Bei ma yami sosoana 'wa na tovoivoi 'atumai'avami, kebu tamu yami sakonaga.

Vona mogitana, yaku nuanua bani'odi.

Yau Iude.